

2. Marts 2016

UPA 2016/143

Inatsisartut suleriaasiat § 36 immikkoortoq 1 naapertorlugu matumuuna apeqquteqaat aallaavigalugu oqallisissiatut siunnersuut imaattoq saqqummiuppara.

**Qanoq iliornikkut sulinerup imminut akilersinnaasunngorlugu aaqqiivigineqarnissaa, isumaginninnikkullu ikiorsiissutit sulileqqinnissamut aporfuijunnaarlugit aaqqiivigineqarnissaat pillugu apeqquteqaat aallaavigalugu oqallinnissamik siunnersuut.**

(Inatsisartunut ilaasortaq Anthon Frederiksen, Partii Naleraq).

### **Tungavilersuut:**

Tusartaannarparput suliffissaaleqisut ilarpassuisa sulineq imminut akilersinnaanngimmat, sulileraluarlutik suliunnaaqqiinnartartut, tassa sulinikkut akiligassanut immaqalu isumaginninnikkut taarsigassanngorlugit ikiorsiissutit akilersorniarnerinut angumassinnaajunnaarneq pissutigalugu suliffik qimaqqiinnarneqartariaqartartoq, tassagoq sulineq imminut akilersinnaanngimmat ?

Pissutsit taamaalersimanerat ajorluinnartutut nalilertariaqarpoq, tassami inuk peqqissoq sulisinnaasorlu imminut ilaquuttaminullu napatinniartussaammata. Tassami nammineersinnaaneq allanillu isumalluuteqannginneq, kiffaanngissutsimut, imminullu tatiginermut, allaammi peqqissutsimut, inuulluataarnerunissamullu pitsaasumik sunniuteqartarmata.

Tamatta eqqaamasariaqarparput 2008-imi namminersorneq pillugu inuiaat kalaallit taasitinneqarmata, taasisinnaasut 77 %-ii nammineernerulernissatsinnut akuersilluta taaseqataangatta.

Miserratineqassanngilaq, suliffissaaleqineq atoraanni qularnanngilaq, nuanninngiinnarani aamma erloqinartorujussuussangunarmat, taamaattumillu inunnut taama nalaataqartunut ikiorsiinissaq pisariaqarluni.

Kisianni tusartualerlugu, suliffissaaleqisut ima, imalu amerlatigingaluartut, sumiiffiit ilaanni sulisussanik amingaateqartarneq pissutigalugu, nunani allaniit allatut ajornartumik sulisussanik tikisitsisariaqalernerneq eqqartorneqartalersillugu, qularutissaajunnaariartorpoq, inatsiseqarnikkut pissutsinik aaqqiissuteqarnissaq.

Tassami eqqortuusinnaanngilaq, ilami eqqortuusinnaanngivippoq, maani nunaqavissut suliffissaaleqisut taama amerlatigitillugit, sulisussanik nunani allaniik tikisitsisoqartassappat, tamanna ajuvinnarani ajorluinnarpoq.

Inuit sulisinnaasut, nunatta siumukarnissaminut pisariaqartippai, taamaattumik aamma tamanut naammanginartumik ikiorsiisarnikkut, inatsiseqarnikkullu aaqqiissusseqqittoqarnissaa pisariaqalivissimasoq tamatta takunngitsuusaaginnarsinnaanngilarput.

Inuit ikiortariallit ikiorneqassapput, inuit peqqissut sulinikkut imminnut napatissinnaasut imminnut ikiornerusariaqarput. Tamatta pisussaaffilingaalluta sulisussaallutalu pinngortinneqarsimavugut.

Taamaammat inatsisartuni ilaasortat aperisariaqarput, qanoq iliornikkut sulisinnaasut amerlanerpaat sulilersissinnaavugut ? Aamma qanoq iliornikkut isumaginninnikkut ikiorsiissutit , inunnut ikiorsiissutinik pisartagaqarsimangaluartunut, suliffittaqqammersunullu pitsaasumik ikaarsaariaataasumik aaqqiivigineqarsinnaappat ?

**Inatsisartut oqaaseqaatissaattut siunnersuut:**

Naalakkersuisut kaammattorneqarput , inuit suliffissaaleqisuusimasut suliffimmut  
ikaarsaariarnermi pitsaasunik atugassaqartinneqarnissaat qulakkeerniarlugu inatsiseqarnikkut  
aaqqiiniutissanik ajuartueqqullugit.